

四庫全書

集部

欽定四庫全書

集部

羽庭集卷三

四

詳校官編修臣范來宗

中書臣劉源溥覆勘

賜錄貢生臣湯達泰

賜錄監生臣俞光豫

欽定四庫全書

羽庭集卷三

元 劉仁本 撰

七言律詩

杭州

移冠西湖十里頭廟堂成筭克神州六橋楊柳旌旗晚
兩岸菱荷煙雨秋壯士椎牛呼白酒將軍繫馬醉紅樓
却憐舊日笙歌地野水清寒滿觸體

至正壬寅秋八月因祀東湖書院過青山惠安

寺登古鼎書樓留題一首

行盡深山處處幽東湖萬頃水雲秋
書堂陪祀人黃耆別院相逢僧白頭
舴艋輕浮荒艾蘋麒麟高卧舊松楸
還山一景移圖畫古鼎清香書滿樓

上虞席上賦

城南花塢韶光好載酒吟詩不厭頻
草色宜留金谷醉梅花別是玉堂春
蛾眉窈窕羞為舞楊柳風流最可人
行樂莫忘康濟念問君何日靜邊塵

壬寅燈夕

原註辛丑冬得邊報已定中原乃壬寅歲上元節四明父老請放燈為昇

平
慶

六街三市萬燈齊喜遇時清息鼓鼙闔闔星辰開混沌
蓬萊樓觀出鯨鯢金蓮影動瑤階濕玉漏聲沉璧月低
小閣吟詩還刻漏光分太乙照青藜

又次前韻

元夕張燈萬戶齊嚴城施禁罷鉦鼙銀花火樹開金谷
青瑣香煙噴玉鯢簫鼓聲中春富貴玻瓈影裏月高低

昇平喜見中興業願得清光照蒼蒼

昱上人出蜀僧與顧氏畫山水王元章畫梅花

共一帙求賦

有客手持三絕畫淋漓元氣薄層霄雲開南岳秋無際
春入西湖雪未消野衲虎頭連二妙山陰鶴骨賣孤標
已無秀色排青闥凝有寒香掛綠松

正月望前一夕與滑伯仁煉藥

委羽山中鶴墮翎老仙為我制頽齡人無金石千年壽

藥有丹砂九轉靈候熟鼎鑪分水火氣吞日月走風霆
輕身已得刀圭祕莫問昌陽與茯苓

贈僧鉉二首

原註癸酉進士伊蘇達寶蒙古人仕至松州長廉介自守僧行四明

竟坐貧以死而無所歸方外交復上人買地葬于寺西偏度其次子鉉為僧余嘗於寺之天香室見鉉侍上人側眉目清瘦能讀書頤嘉之且義其事為賦詩云

渥洼龍駒來大宛駛經曾踏祗樹園老僧買地瘞神骨
稚子出家酬佛恩紺室天香生桂魄青雲高義屬桑門
此郎自是傳衣鉢況有詩書氣脉存

雙峯老子能兼愛十歲孤兒將奈何朋友無歸於我殯
死生有託此僧迦一花新發優曇鉢孤塚還同窣堵波
好向詩書修白業父恩師業兩難磨

寄贈越中烏山間叟上人從復見心請也

昔過慈湖知定水今聞定水說烏山神交坐石三生外
地隔浮雲一片間天竺更誰傳貝葉雨花應自墮塵寰
何時越上游方去却與吾師共往還

送竺曇上人歸天台巾峯

四明雪竇逢行脚五百天台應供身錫杖飛來南竺國
曇花香帶石橋春擔頭孤月空挑鉢江上雙峯久岸巾
問訊還逢諸老宿慚余猶是未歸人

春興

橋影橫空卧夕陽山城烟景煥天章鶯梭織柳隨風轉
燕剪裁花帶露香北去彩雲堆鳳闕東來紫氣繞扶桑
征鞭日送韶光老野店孤眠月一床

瑩上人道貌膚腴機鋒明朗問字於余因字之

曰玉蟾并以詩云

眉端瑞相白毫舒塵刹三千總瑩如天上氣浮金沆瀣
月中光映玉蟾蜍長生莫問姮娥藥靈迹曾成科斗書
顧影始知身是幻廣寒色界浸清虛

為閩僧郁上人題龍溪山房行卷

昔年暫過龍溪寺寺後山房別有僧鼻孔直撿天地外
腳跟遍踏水雲層頻伽小鳥來何有優鉢新花開未曾
歸去泉南真佛國好傳大覺迦師燈

題復上人為徑山悅禪師求歐陽學士碣銘行

卷

徑山天下稱名刹授記僧中識此郎乞與阿師藏舍利
遠干太史得文章孤雲回駐雙峯寺千里歸來一錦囊
却愛遺芳傳桂子至今戒室有天香

原註上人有天香室

次韻奉答定水見心禪師

一壑崎嶇又一丘雙峯還憶舊追游風流此會人俱健
感慨重來路阻修竺國瞿曇深丈室桑乾戍客念并州

何當早見昇平業得與溪山共倡酬

次韻答東山寺報上人

東山西眺夕陽低悵望古人期不來政為危時多暴客
何妨高卧隱長才兩江明月潮先到一逕白雲門未開
試問薔薇無恙不更須洗屐向山隈

訪石梁寺松屏友上人

翠松屏下訪詩僧欲問三生石上盟半榻清香留夜坐
一牕明月聽秋聲不知簷外雲來宿忽報門前潮已生

明日籃輿度山去後期須遣鶴來迎

贈朽石上人

蒼蒼古石出靈山元氣淋漓巖巔頑崖骨半枯龍虎死
土花微蝕蘚苔斑尋常匪阜人皆到咫尺崑崙手可攀
中有精英元不朽生公曾見點頭還

楣榦窩

陽氣潛回小有天白生虛室蜃光圓茯苓根養丹砂火
枸杞香生玉井泉不羨朱門堆獸炭尚憐青海起狼煙

道人芋栗煨將熟紙帳梅花且自眠

次韻答括蒼王熙陽

王郎蚤歲富文章氣燄應如萬丈長處士明時當鴻薦
羽林今日笑鷹揚豐城古劍橫秋色赤水玄珠照夜光
雲外傳來詩句好天葩為我吐芬芳

次韻答括蒼王志學

括蒼我昔訪山君芝草青田養鶴羣處士星躔開分野
仙家丹氣走煙雲春風環珮時相過靈劑刀圭每見分

東壁圖書光燄在他年應共看天文

贈松江節上人

每參栢子庭前意因訪松江湖上來雲氣玲瓏生石榴
天花撩亂落紅臺詩成茅屋同齊已字學蘭亭識辯才
顧我慚非陶靖節廬山空對白蓮開

寄東湖書院高訓道

教養東湖馬廣文諸生訓廸得高君故家子弟多聰俊
舊業詩書定策熟白首窮經人已老青燈考課夜初分

休言苜蓿含朝日自是先生樂采芹

軍中悼廉李二萬戶

豎子潢池敢弄兵勢方猖獗未能平輕挑遽喪廉頗勇
深入難為李牧精玉帳公曹嚴夜警金刀瀆血泣秋聲
何當一鼓蠻烟靜洞獠奮氓雜曉耕

秋日過倪仲權不值見其西席烏性善

漫因清事廢催租數日虛過倪氏居一樹荊花秋淡泊
半池蓮葉雨蕭疏園爪破玉浮冰枕野水通潮上石渠

坐久論文歸路晚蟬聲還帶夕陽餘

清涼寺

清涼山色好樓居誰種長竿萬箇餘笙簫風傳虛谷響
蓬萊地近瑞雲舒倚闌豪氣成詩句侵幌嵐光濕梵書
愛此幽深堪攬轡算巢何必定匡廬

奉檄泛海督漕運

風露雙清滿柁樓兩旗催發漕官舟銀河直下天傾渴
鐵笛橫吹海逆行三四點星瞻北斗幾千里路到皇州

白鷗不管人間事共此乾坤日月浮

送戶部侍郎韓君汝舟督漕還京

喜見江南漕運開韓家公子濟川材木牛流馬隆中起
青雀黃龍海上來影動雲帆拂河漢香浮霜粒璨瓊瑰
蓬萊五色霞光曙翹首黃金千仞臺

遊天童寺

廿里松闌天下無朝元寶閣黃金鋪虎跑泉出澗花落
龍過雨來山鳥呼四月八日逢佛誕千秋萬歲祝皇圖

玲瓏巒畔太白下歸棹月明水滿湖

育王山外望天童一逕幽深廿里松天近翠雲鋪閣道
風清碧落響笙鏞霏霏烟靄來雙鶴濯濯峯巒會九龍
回首岸東湖嶺上斜陽倒影濕芙蓉

餘姚出郭憩橫溪寺

十里橫溪似建瓴南雷古迹隱龍靈人家引水為春碓
僧舍開牕近畫屏鴈塚草荒霜月白鳳亭竹倚巖寒青
何人伐木穿深徑遍斲松根取茯苓

遊餘姚姜山寺

原註寺有鐵磬堂天籟軒山有白馬凌雲金鶴峨眉積翠五峯

千年古寺倚蒼岷五葉奇峯秀色新積翠娥眉留夜月
凌雲白馬逼秋旻山僧能說前朝事姜女不知何代人
天籟軒頭聞鐵磬金鶴嶺上湧紅輪

送陳子章赴台州儒學教授

太丘家世出名駒典教榮膺鄉郡除烏府清風三語掾
玉堂舊日五車書莫嗟子佩居城闕尚喜先人有室廬
黃卷青燈須樂育新涼今已入郊墟

送范啓之赴無錫教授

江湖猶誦藥莊名有子青衫拜寵榮衿佩歡迎新博士
墳墓相望兩難兄惠泉茗供公餘樂泮水詩脾分外清
寄語德齋賢太守好將廣廈納儒生

送鄧行父赴無為教授

向年東漬班荆數彼此公餘拂塵絲今日西淮呼棹往
溪山勝處著臯比人生聚首雲萍似客路驚心歲月馳
天地久長功業富鄧林杞梓看他時

題上虞佛座峯慶善寺

剡奥人家佛座峯何年易構梵王宮赤旗天馬來山北
烏瞻潭龍出澗東古甃水花留芡雨小溪雲影度松風
靈源野鶴時相過門外幽深一逕通

上虞百官渡九龍寺

源註寺有舜廟井吳越王錢鏗題以為舜親於此浚

并遂賦解嘲其
墨迹存于寺中

疏鑿功成萬國朝遂尊虞像鎮分茅蒼茫海氣斗牛下
盤礴江流吳越交一曲山村龍九顧千年廟樹鵲雙巢

人言浚井多遺謬敬為重華一解嘲

上虞雲麓寺

雲麓寺前春水發上妃湖外野航多一聲啼鶲僧房靜
五雨鳴驂使客過山筍斲來參玉版松花釀熟薦金波
何妨醉後題詩句莫問空門事若何

夏蓋湖山寺

夏蓋山為大禹峯何年有此梵王宮吐吞日月湖光近
出沒蛟龍海氣通烟靄滿空浮紺碧樓臺倒影濕青紅

蒼生幸不同魚鼈萬古難磨疏鑿功

長湖萬頃禹山前半浸烟波半海田以佃以漁風土樂
為巢為窟水雲連門開日日鳬鷺到酒熟家家魚蟹鮮
便作洞庭浮小艇扣舷明月叫飛仙

宿上虞鳳山長慶寺簡朱伯賢

小越峯南見梵臺青山湖上鳳盤迴五雲樓閣蓬萊近
百頃風煙艸舩來出水新魚供客饌落花啼鳥勸人盃
與君更作峨眉約還達明朝霽色開

育王寺

阿育王山佛古廬平蘿蒼翠接平湖前峯玉几亭亭出
流水金沙細細鋪古井鰻靈如蜥蜴番僧貌坐着覩
寶光舍利時能現塔下青松飛白鳬

四明西山資教寺

原註者德柏庭上人所住有袁文清公紀石

雙錦亭臺隱翠微新篁乍脫錦裯衣湖田萬頃青山繞
野水孤村白鳥飛老柏未枯青尚在黃梅正熟雨初肥
衲僧煮茗供清話玉乳泉頭汲綆歸原註地有玉乳泉

寄謝玄一山人盛熙明饋藥二首

勾漏丹砂照眼明
黃金浮世若塵輕
桑田幾見魚龍舞
蓬島從教鳥兔驚
帝子齋居朝絳節
仙家酒熟釀黃精
相思多夢人間事
一夜瑤田春草生

曾伴羣仙謁帝京
金銀為殿玉為城
功名早遂身先退
修煉長生業已成
黃鶴磯頭行載酒
碧桃葉下醉吹笙
小蒼遺贈丹砂粒愧我凡身骨未輕

過湖用前韻簡王叔雨

磯頭流水小橋灣
門外鳬鷺日往還
長見雲煙浮震澤
絕勝風雨過君山
冰田冷浸三千頃
茅屋新營四五間
叢桂幽居還自好
尚憐烽火暗東關

丹青閣

屹立芝峯會兩溪
溪流環繞舊招提
半間寶閣臨雲際
一片紅塵隔水西
夜靜蓮香僧入定
月移松影鶴驚栖
丹青千古描難就
萬壑風煙望欲迷

癸卯正月迎詔于望春橋

鳳詔頻年轉海來
今朝喜見驛程催
唐家褒將多忠義
漢室求言極痛哀
天上春回芝檢下
江南地復版圖恢
好將鼓吹開恩宴
四野同稱萬壽杯

九日登高

九日相逢憶孟嘉
登高踏遍翠嵬峩
杖頭春色催行步
夜底秋聲答嘯歌
客路西風烏帽破
天涯南望白雲多
東籬舊菊誰能采
辜負淵明奈若何

讀建炎宋師禹通判忠嘉集

原註師禹錄和議
秦檜憲之誣使金

密令金人殺之師禹逃歸變姓名為趙復匿蜀
青城山以死後高宗褒贈忠嘉錄其子事見宋史

大夫出處最分明禍劇還能變姓名奉使赤心懸白日
遊僊紫氣壓青城江山千古羞秦檜鐵石幾人如廣平
忠義可嘉傳信史感懷老淚落縱橫

擬遊禪樂寺舟行過門而不果

龍山暫擬駐麾幢無奈歸心不可降隔岸馬嘶車廄驛
艤舟潮湧丈亭江寶臺高出蒼松並紅樹低飛白鳥雙

折得梅花無寄處夜深和月挿蓮窗

蘭芎山新創平眺亭

我愛蘭芎紫翠堆岡頭為築小亭臺半空烟靄闊千外
四面江山圖畫開野鶴定巢松偃蓋仙人采藥路生苔
風流不減東西眺康濟漸無安石才

鳥人解嘲

鵬鳥飛來止座隅當時却笑賈生迂仙都道士曾同化
葉縣郎官詎可誣鍊得身輕如鶴瘦行來步疾似鳬趨

試從鶴鷺班行看瑞世還應有鳳雛

東湖觀勸農

勸農持酒出東湖喜見田間民氣蘇桃李成蹊春爛漫
郊原過雨土膏腴花邊立仗頻嘶馬竹裏行厨細膾鱸
遠水野航人不渡夕陽天外下雙鳬

中秋遊東湖登霞嶼寺

東錢湖上值中秋載酒吟詩作勝遊一色水天涵萬象
四時風月屬羣鷗馮夷漫奏霓裳曲太乙還乘蓮葉舟

中有補陀霞嶼寺玲瓏樓閣似瀛洲

題王粲登樓圖送李茂先司議

昔王粲嘗依劉荊州不得志登樓作賦以寓鄉思今
荊州中政司議李茂先以使事留四明鬱鬱久居懷
鄉之念如粲也既得歸友人作登樓圖以貽之請余

賦詩曰

江陵山水古荊州極目家鄉萬里愁念子豈為劉表客
思親還憶仲宣樓胷中氣岸排風雨海上行程近斗牛

聞說登高能作賦楚人宋玉漫悲秋

寄呈馬彥輝參議

幾度書成寫不來今朝忽值片帆開京師喜得江南信
幕府先從海上回萬里乾坤懸北極一天星斗倚中台
羣龍正是趨朝日康濟應須王佐才

訪至道宮王虛齋真人不遇

偶來車廡訪琳宮大隱屏前紫翠重路出山腰無十里
門開溪上有三峯丹房霞氣如春暖茶臼雲腴帶露春

試問仙人何處去翛然白鶴下蒼松

題孤山寺詩用林和靖韻

處士清名百世妍故居今作小祇園
神遊瀟灑風塵表詩刻淋漓雨墨昏
山色湖光酣鵠夢月香水影弔梅魂
翛然坐我荒祠下寂寥無從買酒尊

次陸德陽喜雨韻送別徃教東湖

濟枯大作霖三日宴喜殊無酒百壺還憶故人來舊雨
因知有客過東湖農功歲望田中稼詩思秋先井上梧

此際送君膺教育霑濡聖澤進生徒

贈謝玉如山人

三童山外白雲居中有求仙謝玉如一醉滿斟千日酒
半生熟讀五車書丹霞琳館身曾到明月冰田手自鋤
漫採芝蘭過澧浦春風香拂舊庭除

贈黃丹霞仙洞禱雨有應

檄龍為我乞天瓢雷電奔馳神鬼勞萬寶欣欣蒙帝力
千金滴滴飫民膏丹霞道士瑤壇啓紫鳳仙人絳節高

巖壑涼生秋思足瀟瀟萬竹起雲濤

過上虞小越湖

馬蹄纔過驛亭灣又泛烟波艇子還鷗鷺磯頭飛翠葉
杖藜湖上看青山雙雙野鳥來天際短短新蒲出水間
三十六溝春雨足一犁農事頗相關

題上虞長慶寺林壑尤美亭

亭臺林壑知尤美極目須登最上層野水斷橋爭渡客
落花啼鳥坐禪僧五松舊迹俱層土一塔孤擣見佛乘

最喜深春收積雨前山紫翠莫煙凝

平江莎衣道人宋孝廟嘗遣黃門問道

塊然天地一蘧篠晏坐神遊造化俱海上蓬萊纔咫尺
世間甲子只須臾內庭自有真丹火大道何須問黍珠
滿地春風莎草綠一聲長嘯脫凡軀

贈無名道人

道人曾也到蓬萊簸弄滄溟日月來昨日看山過鴈蕩
今朝採藥度天台相隨白鶴時能舞自種碧桃先已開

只恐放還龍虎後依然天上駕風雷

送春

無言桃李漫成蹊折柳紛紛絮滿隄富貴光陰蝴蝶夢
別離風雨杜鵑啼歸心已逐梅花去望眼空迷草色萋
何事王孫苦留滯天涯羈思獨淒淒

傷春

園林漲綠汎清暉澤國繁華事已非王母信傳青鳥去
海翁機動白鷗飛漫從上苑看桃李擬向南山采蕨薇

滿地落紅風雨後春隨杜宇一聲歸

題馬易之韓與玉塗叔良上京紀行詩卷

景運將興禮樂期邦家培植太平基鑾和法駕時巡幸
扈從詞臣發祕思文物兩都班固賦山川萬里杜陵詩
於今十載風塵裏展卷空懷草木悲

題梅花三疊卷

誰按胡笳出遠羌梅花三弄月當牕北枝未逗南枝煖
兩疊重翻一疊腔腸斷玉龍聲第四夢回公鳳影成雙

東風更莫添嗁咽
雪外蓬婆城未降

題鄭克明紀功詩卷

往歲曾聞通政掾
東甌鄭子有才名
行逢樞要人推轂
歸值鄉邦盜弄兵
文事已知能武備
邊勲還許繼家聲
更煩為國陳謀算
奪取江淮閫外城

奉檄征漳寇

虎節門前五鼓撾銜枚
百萬寂無譁鞭鳴金鐙
敲霜月
錦刺銀袍映海霞
化外無知如敵國
軍中有令敢思家

元戎期聽歌聲捷奏藁應湏易相麻

題東山西眺新亭二首

兩眺東山迹未陳西頭重結小亭新謝安李白登臨舊
支遁許詢來往頻江水嶺雲還不盡風颯沙鳥自相親
便當了却公家事高卧林泉寄此身

岡頭深翠竹交加西眺登臨望眼賒隔岸遠山開罨畫
兩江流水學琵琶夕陽返照尤多景漁火炊烟更幾家
為愛新亭成久坐梅花疎影月橫斜

餘姚築城

傷心為問築城人，今古曾經幾戰塵。
負郭長江流不盡，履田瘠土稅何頻。
龍泉寺外多風雨，靈緒山頭泣鬼神。
落日歌聲齊萬杵，將軍一劍倚秋旻。

胡宗器訓廸慈湖書院詩以壯其行

姚江一見眼偏明，鄭海三年學業成。
天末秋風看劍氣，燈前夜雨讀書聲。
賈生未可輕年少，許劭還應重旦評。
今日橫經慈水上，菁莪樂育養蜚英。

送陸德陽攝東湖書院

天下盡崇朱子祀甬東新構陸家基攝行俎豆君同姓
樂教詩書學有師湖上青山多爽氣月中丹桂憶高枝
明年璧俊賓興日還見文章到鳳池

送馬易之主東湖書院事

湖水東頭見學宮教分黨術啟羣蒙曾崇俎豆祠朱子
今喜師儒得馬融蠹簡青燈聽夜雨鯢生絳帳坐春風
鄞邦自是衣冠藪況復書文四海同

次韻南陽馬易之東湖書院雜詩十首

年來經濟業空踈擬向南陽問草廬精舍荒涼重結構
硯田蕪沒費耕鋤青山屋上啼黃鳥流水湖頭遠玉除
幾處故家喬木在趙庭子弟尚詩書

悠然天地一閒身每對青山獨岸巾萬挿牙籤堆架數
一椽茆屋住湖濱乘車司馬題橋處問字揚雄載酒頻
啼鳥一聲春已去落花無數點苔茵

海上蓬萊擬退休遙看蜃氣結層樓刀圭鉛汞同消息

日月乾坤共拍浮
聯句還應題
石鼎吹簫曾見過
丹丘人間萬事多風雨
回首綠林陰正稠

晝靜時聞伐木歌
隔林啼鳥落花多
酒邊白髮入空老
湖上青山翠不磨
上樹健童身似犧
采菱遊女髻堆螺
水雲萬頃迷雙槳
一雨涼生鷗鷺波

萬頃寒漪漾夕暉
楊花燕子傍人飛
湖頭水竹清如洗
雨後桑麻綠正肥
樵唱數聲山鳥和
櫂歌一曲釣船歸
蒼烟赤子騎黃犧
斷岸人家半掩扉

流水柴門暝不關天邊孤鷺倦飛還草深牧子騎牛過
沙淨鷗羣對客閒紅漲一溪花雨外青連數點屋頭山
先生忘却功名事斷送春光詩酒間

獨笑先生莫已知索居還得與羣離草堂荒落誰招隱
澤國生涯費不貲西極驛駘空伏櫪南飛鳥鵠嘆無枝
石闌干外瓊臺月我獨衡茆歸去遲

芒鞋藜杖鹿皮冠迎候柴門稚子歡靖節陶潛曾仕晉
友人李愿蓑歸盤床頭金盡還謀酒罷上田耕獨遺安

花木四時生逸興蒼蒼松竹尚凌寒

湖山買得不論錢小屋編茆竹作椽雅樂生徒閑絳帳
讀書燈火坐青氊故家奕葉兩三姓喬木連陰幾百年
冠蓋當時相望處躬耕多是墓前田

晨起還招館下生日長喜聽讀書聲門前白鳥自來往
屋上青山相送迎水滿池塘魚罟入笱穿牆壁燕巢成
平湖雨過添新綠頗覺詩懷分外清

月湖即四明涵虛驛餞友人別

月湖橋畔水明樓繫馬涵虛古驛頭芳草春深人載酒
陽關聲斷客登舟四邊烽火將休息千里江山足勝遊
如過天台經雁宕為余問訊舊林丘

題古靈書院

先王昔作吾鄉令人仰文章道德尊白簡薦賢俱宰輔
青苗論事盡忠言子孫尚見衣冠族祠宇新開禮樂門
高節容星相對處共看清氣滿乾坤

清心亭為定海尹汪以敬賦

青山誰築小亭幽釣客來為百里侯退食自公携一鶴
忘機無事狎羣鷗此心已共滄浪水清思應涵天地秋

待得風塵稍休息依然歸去理羊裘

原註清心亭尹方來既作艮光亭又

作此亭而賦之以寓謹刑之意御筆諱諱飭謹刑豈容偏詖失持平七條首示清心訓心地宜如冰樣清

過慈溪清道觀

郭裏青山爽氣浮神仙樓觀出東頭兩江春水潮來往
五粒蒼松雲去留倚竹道人清似鶴懸崖屋子小如舟
吟詩有客開軒座俯瞰烟波數白鷗

送中書兵部郎中李伯貞回河南軍中

萬里乘槎過海邦郎官出使擁旌幢分符曾衛天兵下
沿檄還招賊將降王室武功誰第一漢家國士政無雙
東風鐵騎維揚岸礙駕樓船涉大江

寄分省郎中趙文中

蚤歲曾充上國賓文章聲譽藹成均賢良策對三千字
胄子臚傳第一人滿眼干戈愁正苦論心燈火喜相親
丈夫有志崇名節莫使行藏愧此身

送趙彥林謝王成奉表進呈

一封函上九重天萬里心旌日月懸重譯遠來滄海外
靈槎穩泛斗牛邊趙家公子能充使謝傅兒孫况有玄
却向中原覓歸路長淮闊漸息風烟

送周譯史進表赴京

驛頭官柳拂征衫重譯南來進寶函絳蠟小書封玉篆
錦衣中使啓華纊山呼萬歲龍顏喜仗立千官鳳尾銜
奉職小臣思戀闕征驅早晚發黃巖

贈蜀僧月鏡上人住白雲寺

月鏡虛幽萬頃光峨眉倒影入巴江水輪滿駕來天竹
寶匣初開印雪窗照膽清寒金在冶通身瑩徹玉為腔
白雲座上天華雨說法真如鐘應撞

送進士王好問浮海會試

五雲深處望蓬萊王子求儻謁帝來北斗天中銀闕峙
南薰海上錦帆開一聲臚唱風生蹕九轉丹成月滿臺
宴罷瓊林歸去路杏花十里馬蹄催

送進士野質中浮海會試

天開闔闔近瀛州
僊子朝元汎海舟
溟渤三千鵬運翼
瓊瑤十二蜃為樓
乾坤上下風雲會
吳楚東南日月浮
好聽臚傳聲第一
承恩早出鳳池頭

送進士俞伯圭浮海會試

賓興送子上皇州
琴劍春風滿柁樓
擬向日邊登虎榜
先從海上占鼈頭
禹門浪穩桃花暖
月殿香浮桂子秋
聞道鑾坡多雨露
羣僊還許步瀛洲

次韻玄一山人盛熙明八月十五夜同宿鄭蒙

泉提點別館

種藥長鋤手倦拋白雲明月禮三茅未須婉女藏
還許山人借鶴巢玉屑千鍾和露飲瓊田萬頃帶冰敲
却憐飛鳥東湖上寫寄新詩方外交

次韻寄熙明

盤谷歸來學散仙姓名只許野人傳軒裳去我無官守
詩禮承家有子賢麒麟馭鶴羣天外下神光牛背日高眠

紙緣璽紙留真訣勝寫黃庭注內篇

苕溪清隱為畫上人賦

吳興公子畫苕溪中有山僧構鶴樓席展波光春雨過
林開霽色水禽啼詩人獨坐燒茶竈艇子歸來繫柳隄
七十二峯如弁好幾看湖上夕陽低

舟發連江館頭

笑將明月指為期此去應知半載違五虎門開潮正急
一帆風緊棹如飛立沙舟子爭先渡罷釣漁翁暫息機

明日重樓人望處江空歲晚雁南歸

聽簫為沈子和賦

憶自吹簫出禁城沈郎消瘦覽身輕水雲縹渺青鸞下
天地蕭騷白髮生婺婦孤舟空有淚仙人弄玉久無聲
鳳凰覽德今猶遠何日重逢聽九成

題唐僧懷素自叙帖

草書懷素夙名聞落紙縱橫蛇鳥文應是墨池深歲月
漫從劒器走風雲清狂自儗張顛旭丰度何如王右軍

多謝故人能寄我慚無道士白鵝羣

中秋夜舟泊海門金鼈山翫月

秋律平分夜氣清潮來月向海門生眼明玉兔空中下
人在金鼈背上行一色冰田逾萬頃九天風露欲三更
恍然坐我蓬瀛底何處有人吹鳳笙

中秋南樓賞月分韻得天字

今夕中秋月向圓南樓開宴問嬋娟山河缺處無多影
風雨妨時已十年坐客總誇攀桂子素娥曾記寫花牋

更深十二闌干外一色瓊瑤萬里天

壬寅八月十七夜月湖上泛舟翫月

望後秋高月尚圓湖光倒浸水中天蟾蜍漫竊姮娥藥
舡艋輕浮太乙蓮萬里山河微影動幾番烽火捷音傳
十洲三島蓬萊近賀監風流獨悵然

舟發海上

縱觀溟渤暫來樽寫得波濤作海圖白氣微茫開混沌
黑陰光怪舞天吳雙飛水鳥相高下數點風帆或有無

眼底蓬瀛三萬里烟霞縹渺見清都

防運糧赴京二首

一封奏下水晶宮南服車書喜會同天上綸音頒玉帛
海頭蜃氣結青紅雙珠虎佩懸明月萬斛龍驤駕便風
莫問大江南北限涓流從此與天通

偶隨餉餽上金臺姓氏那知格上台一點靈犀通海底
九苞威鳳自天來賜衣香織金泥重錫篆光浮寶匣開
螻蟻小臣思補報常瞻雲氣望蓬萊

清風嶺王貞婦廟

清風嶺上王貞婦噬指成詩帶血題字跡模糊鎖烟雨
廟祠幽寂照山溪偷生羞殺邊庭吏忍死寧為將校妻
獨有當時文相國千年名節更誰齊

舟發錢塘江

滿城風雨渡江來倚棹沙頭潮未回慘澹湖山悲鼓角
蕭疏花柳廢亭臺吳中日報官軍捷閩外時多將帥材
秦望雲深行未得笑從海上過天台

松下居為五郭長慶寺無盡上人賦

五樹蒼松秀可依老僧結屋傍巖扉茅簷明月翠蛟舞
茶竈青烟白鶴歸坐榻年深蘿薜長長鏡春煖茯苓肥
採花釀酒堪留客醉看門前雲自飛

泊定海縣

招寶名山孰可招虎形蹲踞水來朝象犀珠玉通番舶
樓櫓旌旛捍海潮三港水雲天共遠孤城煙霧日初消
官舟幾度出防禦目送征鴻起莫簫

過慈溪縣

山縣得名因董孝官中事簡不成衙慈湖人祀揚夫子
東寺僧居闢澤家四野烽煙多斤堠一川雨露自桑麻
海濱土瘠無常貢范帥遺殃獨賦茶

過寧海縣

寧川鄉邑路峩峩高岸春江帶晚潮戍海每從軍事急
看山不憚驛程遙杜鵑風雨三更夢楊柳闌干十二橋
啼鳥落花堪繫馬行人還赴酒旗招

題瓊臺雙闕

行從流水入天台 悵酌胡麻飯一盃
月下吹簫人窈窕 雲深採藥路裴徊
海波漫託枯桑變 華表空傳老鶴回
翹首羣仙渺何處 煙霞五色護瓊臺

送商公禮回鄉

驛舍梅花春尚遲 客邊送客故鄉歸
中原已靖兵戈難 南國初看鴻雁飛
柏府孝廉傳義檄 春庭怡悅着菜衣
自憐飄泊江湖久 何日塵駿賦式微

草堂柳色

幽人種柳柳成莊萬樹參差蔭草堂漫笑支離生肘腋
尚懷陶令住柴桑黃金細縷春如海白雪飛花水滿塘
九烈仙君應有意他年為子染衣裳

欽定四庫全書

羽庭集卷四

元 劉仁本 撰

七言律詩

送四明錄事陳子上歸鄉

青燈夜雨幾論文
別後江湖每憶君
捷奏南宮新進士
喜趨東郡作參軍
蓬瀛滄海生塵霧
雁蕩天台隔片雲
薄宦不如歸去好
邊城烽火正紛紜

龍山水竹居

愛此幽居水竹成玲瓏樓閣繞蓬瀛琅玕影浸玻璃碧
鸞鳳飛來玉雪清煮茗不勞僧汲井截筒還有客吹笙
我來倚檻題詩處萬籟風生月正明

餘姚州汝仇湖履畝授田

百頃仇湖接土塍扁舟獨泛雨冥冥前年戍海身曾到
今日分田手自經遠近沙洲連水白高低麥壠入山青
櫂歌一曲歸來晚林外旌旗駐馬聽

寄金防禦令子文石

叨陪防禦談戎事聞說均令子材白璧一雙懷美器
黃金千仞築高臺片雲載雨江南去孤雁傳書海上來
準擬明年二三月桃花浪暖聽春雷

在錢塘夢作遊湖山詩

羅浮春色染丹砂暫醉西湖處士家萬里長風吹短笛
一鉤新月掛枯槎綠么翠鳳來瓊島銀闕珠宮散玉華
但見飛儻飛縞帶不知是雪是梅花

題大慈寺史丞相墓

山行十里亂峯迴相國墳塋紫翠堆石馬秋風兩翁仲
杜鵑春雨幾亭臺慈雲塔下蒼苔滿旌德觀前紅杏開
為憶當年尊菜美短蓬蘋末過湖來

攸寧庵為茹孟德賦

結屋南山孰相攸竹苞松茂白雲幽纍纍先塚牛眠地
濯濯諸孫燕翼謀綠水園池重結構黃花杖策更優游
傳家自有詩書舊茹美流芳在世修

金鳳花為陳員外賦

九苞異種來丹穴又見鶴林開鳳花雨露生成王者瑞
雲霞變幻道人家梧桐竹實還相並朱草芝莖漫自誇
政恨杜鵑啼血淚東風特為殿韶華

答徐季章學正見寄韻

聞君早習南華隱愧我來持使者麾嶺上白雲堪自悅
袖中明月忽相遺時危總佩摧姦効事定難磨詠史詩
何日清飈斂黃霧衡茅風雨共棲遲

送姪元法學正任滿

我官分署浙江東咸姪隨行勝阿戎坐對斧宮聽夜雨
夢回栗里動秋風青槐尚喜家兒在白髮遙憐吾弟同
大父遲歸應已久諸孫惟汝愛偏隆

雪篷為陳元昭賦

道人鍊得雪無瑕編竹為篷戶不遮一曲清溪回劍棹
半規明月浸蘆花候爐夜氣流丹蜃虛室神光飛白鷗
我有冰田三萬頃共君何日泛靈槎

題紅白梅花畫

誰探海底珊瑚樹斜倚玉龍披玉鱗香影總沈寒水月
色身分受艷陽春湖頭放鶴林和靖雪裏燒丹梅子真
南國風光慨回首紅紅白白競精神

送篤彥誠赴南臺照磨任

三策當年覲聖顏聯翩鶴鷺立清班纔持霜簡湖南去
又駕雲帆海上還御史行臺開幕府蓬萊高閣近家山
姚江城下逢君別客路梅花不可攀

具慶堂為樞密架閣李思冉賦

八十慈親八十翁齊年高壽未龍鍾疑行鳩杖雙扶出
同拜鷺臺七品封有子綵衣供菽水居官翠幙泛芙蓉
華堂具慶持春酒此樂人間不易逢

癸卯新正次盛熙明見寄韻二首

屢歲調軍戰鬪酣新年還復視廬菴中興業見車書一
太極陽回象畫三瀚海鬼魂收白骨洞庭春色釀黃柑
洛陽漫聽鶲聲急地氣由來自北南

戰策功名夢已酣退休疑共結茆菴乾坤補報百無一

歲月推移五十三文氣誰能催視草聖恩遙想賜傳柑
白雲只在空明洞千里思親憶斗南

餘姚白水宮瀑布二首

白水真仙騎白龍何年蛻骨此山中化為玉棟垂千尺
翻却銀河落半空鶯夢曉遺明月帳絞人夜掣水晶宮
天台有客詩難就歸興瓊臺雙闕東

中天飛瀑下瑤臺素練高懸亦怪哉織女投機收不得
姮娥剪水巧為裁光連雙闕星河動響挾千山風雨來

祠宇洞前看未足又隨明月過天台

上虞鳳鳴山仙洞飛泉

真人洞口白雲深一派飛泉掛壑陰不見丹臺威鳳下
還開鐵筆老龍吟雷聲隱轉千鈞石雨意常含六月霖
疑是棄遺鉛汞水化為冰雪洒人心

題義狸卷

原註四明胡用和生櫨二狸其一逸去復來齧櫨似援其不得共去者用

和嘉其義遂兩釋之進士
胡世佐為之傳人咸賦焉

胡儂羅置兩山狸一黠偷生脫穿圍患難既同難獨免

義恩有感得雙歸夜深月黑狼狐走秋後霜晴柿栗肥
好向林間高遁去更休貪着踏虞機

孫著室講易

世季文衰易已東乾坤幾息道屯蒙人從既役形骸後
物蔽初生天地中三十六宮春氣轉百年萬數範圍同
老仙獨坐神著室妙契當年太極翁

寒碧亭為疊半雲上人題

寒碧涵虛曙色分半溪流水半溪雲門前綠樹相繆轄

屋上青山亂糾紛龍雨欲來崖削鐵蘋風微起浪成文
老僧盥濯幽亭下獨坐心清香自薰

宴荷亭

新秋水木散清華倪氏池亭小似槿賓客倚欄看芡藕
主人隔竹喚茶瓜百壺酒盡烏紗墮四坐詩成白雪誇
喜有山僧來入社遠公遺愛在蓮花

釣魚軒為龍子高賦

溪山勝處卜居幽百頃滄浪一釣鈎換酒呼童將錦鯉

放歌展席對沙鷗。羊裘高隱桐江上。熊兆應懷渭水頭。
好共任公垂巨犧。六鼈風雨海天秋。

題環溪孫元質松風軒

環溪風撼萬松林似奏釣天廣樂音翠節翩翻笙鶴下
蒼雲掠亂水龍吟月生陰壑同靈籟人坐幽軒罷素琴
我亦披襟來濯髮翛然激烈歲寒心

題問月軒

圓缺陰晴竟若何。幽軒把酒問嫦娥。天時皎潔光輝少

人事參差感慨多
關塞連年窺白骨
蓬瀛萬里接銀河
欲求蟾兔長生訣
須泛靈槎斗畔過

題秋月軒

高秋夜色淨如銀
坐對幽軒看月輪
多少陰晴圓缺恨
消磨天地古今人
屋頭仰見明河落
鏡裏愁添白髮新
欲泛靈槎覓靈藥
要將風露洗風塵

至日西樓宴客

律轉黃鍾玉燭調
初陽纔動覺陰消
誰能候氣如葭琯

客有可人吹洞簫北信漫傳烏鵲喜東風獨放海棠嬌
惜無魯觀書雲物空注丹心望闕遙

十一月二十四日

原註國典凡慶賀值雨
雪即不具公服行禮

旌旄拜舞千秋節遙祝儲宮憶帝畿萬里乾坤空在眼
一時雨雪正霏衣龍樓問寢移仙仗毳帽函香滿禁闈
闕陝尚憐兵氣結西風望斷鴈南飛

五言排律

咏雪十八韻

獻歲先三日豐年驗屢臻混元歸太素大塊曇無垠頃
刻模糊遍纖毫幻化勻瑰奇齊炫燿珊瑚競精神十二
珠宮燦三千縞袂純閭閻皆賈瑞山澤總呈珍傅粉誇
光寵堆藍阤後塵青尖藏馬耳白戰蛻龍鱗樓閣移清
觀瓊瑤街大釣冰凝詩硯鐵水瀉瓦溝銀孤鴈嗷求侶
飢鷹搜近人清池鵝影亂恠石虎形跋詠絮才堪擬觀
梅韻逼真微吟動東閣清夢隔南閨閉戶從高卧映書
寧厭貧仁風回块北元氣返氤氳意思窻前學胚胎地

底春詩成語田父喜色動津津

建寧北元噉山造茶是日天大雷雨高奉御至
山元蘊瑞草木亦敷榮遠土職修貢官曹任權征君恩
濡澤降天助震雷轟鼓譟千軍勇喧騰萬蟄驚仙靈煩
酒醴使者引旌旌白玉堂前客紅雲島內行靈根連夜
發凡草感春生漸覺龍芽吐先期鳳觜萌邇巡分堠卒
掇拾課山丁紫筍和煙採金筐帶露盛槍旛俄錯落粟

粒迸輕盈散亂碧濤影玲瓏玉杵聲雪香金碾碎雲冷
石泉泓軒翥鸞凰瑞參差圭璧呈團圓明月起隱隱翠
蛟嶸包匱殊科第封函致潔精薦新誇絕品馳貢入神
京上為君王壽下據民物情武夷同譜牒禹貢孰稽程
陸羽千年夢盧仝兩腋清廟堂真燮理黍稷享精誠賦
羨無遺物科徵念遠珉彤雲闊山谷絢日隔蓬瀛願以
陽春德千秋奉聖明

代虞江宴別詩陰字韻

行役方趨陞朋從喜盍簪自憐循宦轍及命掌詞林報
國丹心在頻年白髮侵金鑾還召對玉節尚遙臨東壁
星纏瑞南溟海氣深靈槎須犯斗闕闔啟層陰

贈姪郭元亮

郭氏承劉胤汾陽續沛豐舅甥因好合氣脈始相通瓜
瓞同曾祖螟蛉自我翁事殊三世後居隔片雲中深慮
婚姻難遂謀祠祭同尚懷高魏族不愧寫山風我去家
鄉久汝來恩意隆分雖存伯姪服已殺朞功自匪親兼

義誰能遠即戎既然情懇懇胡乃別匆匆愛爾雙瞳漆
悲余兩鬢蓬家聲當振勵學力貴優充盈酒殷勤敘行
囊遺贈空作詩聊勉誨極目送歸鴻

七言排律

汀漳平寇回軍至福州建黃錄大齋醮于東嶽
帝之行宮賦二十二韻

老君臺上清光近壇壝崇巖翼泰山道化玄微沖漠際
天人交會感通間雷霆叱咤神官集河漢昭回星曜環

五色寶光浮紺碧三台華蓋擁朱殷指揮劍劍旛旗矗
扈衛森森劍戟閒一念精誠祈陟降百靈竦息制邪姦
太清聖境金銀闕上界仙曹玉筭班明月笙簫鸞舞下
冷風環珮竊飛還蛟龍並出扶雙輦虎豹齊驅闢九闕
瑞結靄煙飄旖旎輝騰奎璧絢斑爛綠章封進雲霞篆
黃道重開日月闌絳節徘徊齊接引朱宮縹緲獨躋攀
鳳翬麟趾承丹宸寶被珠瓔侍翠鬟飛步魁罡旋斗口
肅趨殿陛拜天顏齋薰肅歲清修事感格殊深惠澤頒

矯矯帥臣親奉檄桓桓師旅出征蠻痛茲禍孽塵氛惡
啓我戎行甲胄擐殞命捐軀哀士卒戮尸暴骨愍充頑
漫漫長夜幽冥隔慘慘昏霾風雨潛仰迓泰階霑福祉
同躋壽域固恫瘝協和坐致陰陽理康濟應思民物艱
遂勅伊祈司下土靄然春盎滿塵寰

杭州南山水樂洞

石屋寺前一徑通南山秀色開雲封谿砑石洞藏幽
壯的礫銀河當要衝萬竅風煙如斧鑿五音水樂鳴琤琮

軒轅不秘鬼神泣律呂相宣日夜春崖骨淋漓生凍蘚
土花剥蝕緣枯松雲邊樓閣逢僧指眼底風雷盪我胷
為囁奚奴母飲馬應知此地有眠龍窮觀更陟煙霞嶺
一嘯攀摩象鼻峯

題南唐惠崇遠景畫卷

惠崇毫素出天機貌得瀟湘景物歸極目滄洲生遠趣
平川秋思淡晴暉寒煙斷岸巴陵曲野水枯槎黃鶴磯
渚鳥沙禽來簇簇江蓮蓀羽淨依依鷓鴣屬玉爭羣聚

鴻鵠鳬鷺散漫飛隨意迴翔隨飲啄或相親近或依違
浪花浩蕩鷗波闊叢葦蕭疏鴈陣圖亂植蒲篁迷浦澈
列行汀樹鎖煙霏枝頭倦翼風還靜石角滋芳露欲晞
睥睨閒情齊物化胚胎元氣幹玄微想當意匠經營際
妙奪神工取次揮曾是江南夸品絕忽驚眼底見來稀
摹臨不羨雙鈎筆盤礴何當一解衣添却武陵漁艇子
桃花流水鱖魚肥

五言絕句

題羅稚川小景畫四首

白鷺聯拳靜蒼松並榦齊桃花無數發疑是武陵溪
出水新蒲短和煙翠柳深一雙黃鳥並斷岸聚文禽
紅葉迷煙樹黃蘆間白蘋江南秋色裏還有鴈來賓
恠石蹲鹽虎枯槎掛玉龍飢鳥相並立無處啄寒葦

雙松圖

風雨生巖壑冰霜耐歲寒終為棟梁具莫作畫圖看

洗馬

慈嶺來呈瑞昆明已息波將軍回玉鞍壯士挽天河

逸馬

玉花出御榻飄逸如飛鳳奚官試錦驥神驚不受控

飲馬

琨池飲寒玉照眼雪花明聞說長城窟年年水亦清

原註

飲馬處澗名
水清故云

明妃曲四首

和親誠上計安用漢將軍粉黛無顏色丹青有策勲

辭別君王去邊中要結親只愁渠眼大不見漢宮人
一曲琵琶淚金鞍細馬駛休言妾命薄不及漢恩多
未坐邊塵帳猶懷漢守宮君恩儻可續妾貌自無同

來鶴亭

結構萬松頂悠然一小亭月明雙白羽飛下秋冥冥

奉林道院

仙人劉奉林騎鶴上天去何年有祠宇雲蘿鎮蒼翠

劉彥芳畫像

寄傲林泉客逍遙自在身山童白羽扇流水石橋春

新瑩

北顧行玄武平原下飛鳳我營霜露宅僻近仙人洞

文獻書院

文翁宗道學清獻有詩傳禮樂存千古祠庭拜二賢

老馬

天寒苜蓿短病骨怯西風先帝親征日曾多汗血功

西江

長江流不盡盤曲繞山西潮生復潮落漁舟繫柳堤

水墨梅花七首

杖藜冰雪底清興與誰同好約林和靖來尋陸放翁
踈花三兩點老骨一枝斜明月西湖上清風處士家
一枝斜蘸水淡月正黃昏為問西湖上誰招處士魂
西湖人放鶴東閣客吟詩冰雪生清興梅花只自知
閱歷冰霜久山顛共天涯東風吹畫角奈此老槎牙
鐵幹踈花淡綠毛公鳳雙道人清夢斷明月下寒牕

冰霜和雪月何處看枯槎載得林和靖題詩湖水涯

七言絕句

建上四景

白鶴峯朝五鳳樓紅塵隔斷水東流通仙橋上多車馬

二月游人出建州

丹青閣上紫芝峯十里長橋似卧龍水隔城南多少寺

樓臺煙雨鎖重重

玉青洞口綠楊堤雲滿沙堤水滿溪有客泛舟明月下

何人橫笛畫橋西

綠樹陰濃鎖慢亭北來流水護重城紫霞洲上神仙宅
時有月明笙鶴聲

漁翁

魚穿柳葉來沽酒櫂入蘆花不繫船兩岸江山誰是主
一蓑煙雨對鷗眠

題萱草竹圖

幽幽萱草樹堂陰慈竹堂中慈母心漫為忘憂永相託

倚門欲聽鳳凰吟

梅

姑射仙人冰雪姿翛然對客愛吟詩月明寄得江南信
還憶西湖放鶴時

題枯木竹石

老樹槎牙枝葉乾幽篁新長小琅玕頽然一片堅真石
好共先生耐歲寒

枯形禿髮亂髡髡山中喚作木瞿曇石逕無人秋月白

一枝筇竹倚江南

贈白雲上人住龍泉寺

餘姚城下水漣漣萬鍤深壕古寺邊一片白雲留不住
曉來將雨過龍泉

餘姚城下萬軍屯一曲江流兩岸分好是陽生長至日
龍泉山頂看書雲

題梅花卷

玉龍一曲動江城萬斛珠璣照眼明羅浮道人清不寐

梅花枝上月三更

題水墨折枝梅

領下神珠照眼明老蛟蛻骨月華清夢回鐵石心腸事
還寫梅花憶廣平

題畫繁梅

晴昊繁花開遍時畫工淡墨寫離披如何不會冰霜意
亂作南枝與北枝

寄梅圖

萬木凋零霜雪摧
孤芳昨夜領春回
驛頭消息憑誰寄
須待綠毛么鳳來

題袁安道梅花卷

綵筆生春奪化工
東風不得壽陽宮
冰肌玉骨精神處
絕似袁郎臥雪中

題青山白雲畫

天際青山千萬重
磯頭綠樹夏陰濃
白雲却在羣峯外
隱約飛泉挂玉龍

題孟浩然騎驢畫

賈島苦吟衝大尹淮陰馱醉謫神仙
雪中一段清奇事輸與襄陽孟浩然

雙松閣

石峽中間兩怪松蟠枝直幹翠重重
山人別後多風雨他日歸來已化龍

贈鎬字李顯中

昭代幸無朋黨籍磨崖還有中興碑
李生一寸幽州鐵

好為元勛勒鼎彝

題棠梨三禽圖

棠梨小樹飛山鵲
荆棘橫枝兩白頭
卉木羽毛同造化

春風樂意自相酬

雙鵠圖

畫圖雙鵠立枝高
日日相看慰寂寥
好在堂前頻報喜
不愁天上役成橋

題春樹暮雲圖

春深渭北題詩處雲壓江東載酒船一夜相思人不見
屋梁落月共蟬娟

題冬景山水

屋頭崖壑懸冰練雪後峯巒似削銀何許幽人清興足
抱琴來看玉璘珣

題書隱圖

屋頭流水溪頭樹山外白雲橋外村何處讀書開竹檻
有人載酒過柴門

題嚴瀨風煙圖

太史眼中星斗動
先生脚下水雲寬
漢家二百中興業
只在桐江一釣竿

題息齋枯木竹石圖

葆羽玲瓏集鳳阿
修然蒼節倚枯槎
玉堂仙子清如許
寫得瀟湘秋思多

題青山寺書樓畫壁二首

雙逕行來五朵峯
白雲深處梵王宮
何緣圖在書樓上

祇為曾留古鼎翁

湖上青山山上樓老僧獨坐白雲幽
何人收拾筆鋒裏散作淋漓元氣浮

送顏右丞赴都

別酒醺醺雨作晴故人心共海霞明
雲帆駕得天風健萬里扶搖上玉京

題宋祖蹴踘圖

曾見忠言論擊毬轉圜從諫喜如流
誰知蹴踘俳優戲

踢動乾坤四百州

襍詠三首

海島癡雲紅作陣山林漲雨綠成圍
閉門東郭憂不出

松江主人何日歸

潑墨濃雲徹大陰沈沈閭閻九重深
憂天每作杞人夢
填海空懷精衛心

東南漲海風波惡西北天傾雨露寬
我亦未能明此理

出門仰視雪成團

次經畧使李治書遊空明洞天韻

夜宿空明道士家煉臺丹炁濕青霞步虛聲響隨明月
來向天壇作散花

香燒明月淡秋雲方石亭前坐夜分見說洞深瀛海近
昔年曾有櫓聲聞

過茶洋驛次李憲副詠飛雪亭韻二首

老僧曾弄銀河水愛此飛泉便作亭料是九天收不住
故將冰雪洒南溟

何處月明風雨急泉聲一派掛槎川奔流直入劒津去
驚起雙龍夜不眠

感事

西風一夜到林巒無數秋聲在樹間獨有啼鳥栖不定
踏翻明月滿空山

題趙子昂馬圖

番奴毳帽赭衣新萬里牽來覆錦裯華萼樓前呈御榻

翻身曾見袞邊塵

原註寧王為明皇帝畫六馬滾塵圖於華萼樓壁上

題曹錄判所藏將軍霸馬圖

尾撒流星首渴烏靈源神草幾番枯一從飛入瑤池去
化作君家獨駿圖

題支遁與許詢王逸少看馬圖

山僧愛馬非愛馬奈此天機神駿何空忝許詢同一顧
還似蘭亭喜弄鷺

題劉商觀奕圖

當年曾過柯山下石洞棊枰苔蘚班仙子不知何處去

空傳遺跡在人間

延平驛二首

劖潭千頃淨無垠岸曲樓臺架水雲半夜風雷吼神物

三川星斗印天文

延平驛畔古蟬津繞郭青山亂糾紛幾度官舟泊沙尾

鷓鴣不忍隔江聞

題扇面贈李司儀回京

落花零亂燕呢喃萬里修程一短驂好向五雲深處去

玉簫吹徹望江南

題扇面送友人回京三首

兩年為客閨南海一日歸家上北船白髮故人相見好
黃金臺上九重天

五月南風送客舟水雲萬里接蓬丘道人不唱凌波曲
飛上瓊瑤十二樓

中原草木已成陰萬里江南一寸心後夜相思何處月

黃河秦華極高深

帥闔夜直

官柳青青鎖署門
官中無事又黃昏
銅壺漏箭傳三刻
月浸芙蓉玉一痕

題馬易之觀光行卷雲林圖

雲山歷歷畫圖開
老樹蒼蒼梁棟材
無限江南春意思
越中詩客帶將來

括蒼省覲二首

曾向三山跨鶴回
又尋處士括蒼來
白雲只在好溪上

引出青蓮萬葉開

一葉扁舟上括蒼石門洞口月昏黃青田野鶴歸來晚

七十二灘煙水長

答趙德純馬蘭花

山中水竹愛深居長日幽人自讀書案上小花名馬蘭
相親喜得兩相如

題松石道人像

片石堅貞冰玉操長松偃蹇歲寒心道人自得幽閒趣

石上松間把素琴

題陸放翁齊安墨迹

原註俛仰宇宙茫茫陳迹
前修不可見矣猶因其遺

墨而可想其丰儀者寧不重有感乎

越上曾過陸氏莊風煙月露水雲鄉今朝忽睹題詩迹

重憶坡仙舊雪堂

題慈湖楊先生墨迹

慈湖春水發淵源仰止先生道德尊手澤有人藏翰墨
片言隻字尚堪論

題畫

重重巖壑白雲門上有仙人禮斗壇俯瞰洞庭聯左蠡
長風萬里起波瀾

江上春光照眼明神仙樓觀出丹青武夷九曲差相似
若箇中間大隱屏

兩岸青山遮古道一篙春水棹孤舟蒼煙暝色歸鴉晚
猶有行人立渡頭

夏日村中

芳樹依依鎖翠烟。小池荷葉綠鋪錢。
醉人曉起朦朧眼，錯認榴花作杜鵑。

題溫日觀畫葡萄

日觀山頭有老僧。葡萄幻出墨稜層。
維摩不坐真珠帳，引得狐禪語葛藤。

書便面贈禪寂寺一玄上人

山僧野客共襟期。對榻吟詩夜漏遲。
萬竹庭前秋雨過，

紫薇花下月明時

原註寺多竹
紫薇花甚茂

水西寺訪空上人

溪虛雲靜雨初收松竹涓涓翠欲流窗外落花春已莫

一聲啼鶲隔沙洲

小箬站二首

小箬渡頭潮水來西風嫋嫋片帆開篙師為我輕移槳
莫使前灘鷗鷺猜

昨夜扁舟水口灣今朝驛路擬盤桓却貪兩岸峯巒好
不憚撐篙逆上灘

陪建寧太守宴水南樓索贈歌者二首

兩岸垂楊鎖翠樓玉人歌舞錦纏頭海棠枝上東風軟
銀燭燒殘月半鈎

寶篆香燒酒欲醒一聲歌徹綵雲凝朱幡五馬樓前月
人在重雲第幾層

再陪宴用前韻

夜月春風燕子樓佳人擊碎玉搔頭天涯芳草無消息
塵滿朱簾懶上鈎

香醺宿酒未全醒坐對冰壺玉露凝月落翠消人散後
綵鸞飛上寂高層

贈陳雲舟

一片飛來壓柁樓有人擊楫坐中流無心去作他山雨
滿載江南萬斛秋

平江迎詔

玉京春信阻佳期十月江南歸鴈遲天上暗滋新雨露
吳中重覩舊官儀

題十牛圖

或行柳外或陂陀度水相呼或寢訛春草幽幽春雨足
何人更唱短衣歌

木芙蓉畫

光浮仙掌露華濃香滴丹砂暈玉紅太液池邊秋月白
參差霞佩倚西風

寄題永樂寺

永樂寺前江水深隔江遙見白雲岑梅花帳底僧未起

官舟帆影月初沈

永樂寺前江水橫潮落五更殘月明詩人每負山僧約

不來亭上看雲生

九月十一日遣內還家為子畢姻二首

博山香透近簾櫳阿母青鸞信息通風定銀床秋夜靜
夢回涼月在梧桐

大父年高載受封阿孫授室翠幃重山妻兒女團欒處
老我家鄉夢裏逢

簡葛鍊師

月明一陣過雲雨夜半涼生枕簟風起坐石闌無箇事
翛然秋信下梧桐

贈羽士周敬存

道士今非丁令威一林烟雨自吟詩午炊不作青精飯
留客同參玉版師

贈北高峰趺坐道人

梅花紙帳小蒲團好在高峰頂上安夜半忽聞孤鶴唳

一輪明月寶光寒

題天函上人扇面

竹院相尋秋意多
道人無奈月明何
不騎白鶴須黃犢
却寫黃庭換曰鶩

宮詞

宮樹風微玉簾涼
錦衣小隊過川廊
曲闌干外梧桐月
照見銀篝曉夜香

舞靴輕轉玉階前
憶昔承恩已十年
記得當時供奉曲

上皇親自月宮傳

恩從內殿賜茶還
剩得龍團月半團
手挹瑤瓶注溝水
香分涓滴到人間

內賜回來隨例恩
芙蓉葉上月黃昏
銀燈雙引轆車過
擁入紅雲第二門

慈溪東皋茶亭詩

試問東皋老萬迴道傍築室為誰開
登程客已喫茶去
渡水人從彼岸來

題寧溪圖用毛儀仲韻七首

寧溪巖壑古風煙舊住人家不記年隔岸小山三四點
娥眉終日淨娟娟

萬壑風煙撥不開宛然雙闕對瓊臺吹笙子晉今何在
石橋流水似天台

桂子花開水滿堤青山兩岸與樓齊有客醉歸明月下
十里天香送馬蹄

蒼煙落日小漁舟溪北溪南載我遊遊到王家遠庵下

白雲深鎖舊梧楸

一丘一壑水雲間
欲作淵明歸去難
五馬雙魚相對好
秋風寫入畫圖看

溪流一曲遶村莊
溪山十里野花香
溪畔飲牛人度水
溪頭女子採柔桑

溪人種竹滿溪頭
載酒吟詩溪上遊
寄語溪居王少府
何人得似渭川侯

登福州南臺廟三首

原註廟乃無諸氏生嘗以步騎從番君助漢滅秦死

後廟
食馬

把酒高歌閩越臺
暴秦炎漢總成灰
至今猶見屠龍處
山挾江頭風雨來

釣龍臺上幾登臨
閩粵江山無古今
啼鳥落花春事靜
滿城荔子綠陰陰

釣龍臺下水平堤
荔子樓前繫馬嘶
不見無諸宮苑舊
空林還有鶗鴂啼

次韻寄盛熙明

藥苗芝草淨纖纖酒熟黃精石蜜甜紫府靈丹通火候
紅爐飛雪白於鹽

流水潺潺泛落花誤因採藥到僊家歸來幾換人間世
回首雲深路已賒

跋余忠宣公詩

余公高誼薄青雲激烈成吟贈隱君十載淮西能死節
看詩欲作誄忠文

過高起文幽居

粉蝶羣飛入菜花，柔金碎玉亂交加。
天然富貴春風裏，屬在長城野老家。

山居

修竹柴門閉不開，山中無事少人來。
一樽魯醞堪留月，數首新詩總為梅。

鄭江送別

兩岸青山照眼明，風林行李別離情。
絕憐舟子來催發，報道江頭潮已生。

嚴瀨圖

百頃風煙一釣絲雙松挺挺歲寒期嚴陵只在桐江上
千古難描岳壑姿

折桂枝

仙子翩翩環珮輕廣寒宮殿月華清桂林折得一枝下
好對昆山片玉明

塞下曲

錦帽貂裘小隊分蒲萄馬上醉昭君銀箏夜坐彈明月

玉帳秋高獵陣雲

帳壓寒雲雪未消羽林圍獵試弓刀滿斟白漁燒黃鼠
仰看青天射黑鵬

閩中女四首

原註閩之人汎海入番十餘年不歸其妻訴之述其言為賦

閩中女兒顏色嬌雙雙鸞鳳織鮫綃織成欲寄番船去
日日江頭來候潮

海南番舶盡回鄉不見儂家薄倖郎欲向船頭問消息
荔枝樹下買檳榔

當時郎着淺番衣淺番路近便回歸誰知却入深番去
浪逐鴛鴦遠水飛

象犀珠翠海南香萬里歸來水路長薄倖又從何處去
十年海外不思鄉



